

Faanatinatiina o le Galuega o le Faaolataga

Mafaufau loloto i fesili nei e fesootai i eria taitasi e lima ia oni vaega o le faaolataga:

- E faapefea e au taumafaiga i lenei eria o le galuega a le Alii ona aumaia isi ia latalata atili i faamanuiaga o le faaolataga?
- O a aafiaga na oo i ai ma faamanuiaga na e maua ao e auai i lenei eria o le galuega a le Alii o le faaolataga?
- O a mea e mafai ona e faia, e tusa lava po o le a lou valaauga o i ai nei i le Ekalesia, e saofaga ai i lenei eria o le galuega o le faaolataga?

Galuega Faafaifeautalai a Tagata

Ua aoao mai Elder Neil L. Andersen o le Korama a Aposetolo e Toasefululua:



“Uso e ma tuafafine, e pei lava ona uunaia e le Alii le toatele o faifeautalai e auuina atu, ua la fagua foi mafaufau ma tatala loto o le toatele o tagata lelei ma faamaoni e taliaina Ana faifeautalai. Ua tou silafia pe o le a silafia i latou. Latou te i ai i tou aiga ma o ni tou tuaoi. Tou te fepasiai i le auuala, nofo i ou

autafa i le aoga, ma tou te fesootai i le initoneti. O oe foi o se vaega taua o lenei vavega o loo tupu.

“Afae e le o oe o se faifeautalai faamisiona e i ai se pine faifeautalai e faamau i lou pelaue, o le taimi la lenei e vali ai se pine i lou loto— ia vali e pei ona fai mai Paulo, ‘e le tusia i le vaitusi, a o le Agaga o le Atua soifua.’ [2 Korinito 3:3]. . . . E tofua i tatou uma ma se saofaga e faia i lenei vavega” (“O se Vavega Lava,” *Ensign* po o le *Liahona*, Me 2013, 78).

Faatumaaina o Tagata Liliu Mai

Na aoao mai Elder M. Russell Ballard o le Korama a Aposetolo e Toasefululua:



“E tatau ia te oe ma au ona faia mea uma ina ia faaumeaina atoatoa tagata uma o le Ekalesia ma olioli i faamanuiaga o le talalelei.

“Ua faamanatu mai ia te oe ma au e Peresitene Gordon B. Hinckley o o tatou tiutetauave e galulue soosoo tauau ma le Alii i le faatau-nuina o Lana fuafuaga mo le Ekalesia. I se faasalalauga o le satellite na saunoa ai Peresitene Hinckley:

“Ua tuuina mai e le Alii ia i tatou se poloaiga ina ia aoao atu le talalelei i tagata uma. E manaomia ai taumafaiga silisili a faifeautalai uma—faamisiona ma le siteki. E manaomia ai taumafaiga silisili a epikopo uma ma fesoasoani uma o le epikopo, o tagata uma o aifono faaleuaroa . . .’ (‘Saili Tamai Mamoe, Fafaga Mamoe’ *Liahona*, Iulai 1999, 118). E manaomia ai taumafaiga silisili a tagata uma” (“O Tagata o le Ekalesia o le Ki Lea,” *Liahona*, Set. 2000, 12).

Faatoaagaina Mai o Tagata o le Ekalesia ua Le Toaaga Mai

“O la tatou matafaioi [o ni Au Paia] o le faatofuina o i tatou lava ina ia alolofa ma auuina atu ia i latou o siomiaina i tatou—faamafanafana atu i se tagata lua te faigaluega o loo

i ai se manaoga, valaaulia a tatou uo i se papatisoga, fesoasoani atu i se tuaoi matua i se galuega o lona fanua, valaaulia o se tagata ua le o toe malosi mai mo se taumafataga, po o le fesoasoani i se tuaoi i lana talafaasolopito o le aiga. O ni auuala masani uma nei ma le fiafia e valaaulia ai ni tagata ua le o toe malolosi mai ma i latou tatou te le o tapuai faatasi i o tatou olaga ma faasolosolo atu ai lava ina ia malamalama i le talalelei. O le fetufaai atu ma i latou i taimi malie ma taimi paia o o tatou olaga atonu o se auuala sili lea ona lelei e mafai ai e soo se tasi o i tatou ‘e galulue i lona [Iesu Keriso] tovine ma le faaolataga o agaga o alii [ma tamaitai]’ (MF&F 138:56)” (“Faanatinatiina o le Galuega o le Faaolataga,” *Liahona*, Oke. 2013, 36).

Galuega o le Malumalu ma Talafaasolopito o Aiga

Na aoao mai Elder Quentin L. Cook o le Korama a Aposetolo e Toasefululua:



“Ua tuuina mai e taitai o le Ekalesia se valaau manino i le tupulaga faiae ia taimua i le ala i le faaogaina o tekinolosi ia maua ai le agaga o Elia, ia saili i o tatou tuua, ma ia faatino sauniga o le malumalu mo i latou. O le tele o le mamafa o le galuega i le faanatinatiina o le galuega o le faaolataga mo e uma o soifua ma e ua malililo o le a faia e outou o tagata talavou” (“O Aa ma Lala,” *Ensign* po o le *Liahona*, Me 2014, 46).

Aoao Atu le Talalelei

“O le matafaioi o le aoaoina atu o le talalelei e le o faatapulaaina na o i latou o i ai ni valaauga taualoa e avea ai ma faiaoga. O le avea ai ma se tagata O le Ekalesia a Iesu Keriso o le Au Paia o Aso e Gata Ai, ua ia te oe le tiutetauave ina ia aoao atu le talalelei. I le avea ai ma se tamā po o se tina, atalii, afafine, tane, ava, uso, tuafafine, taitai o le Ekalesia, faiaoga i le potuaoga, faiaoga o aiga, faiaoga asiati, paaga faigaluega, tuaoi, po o se uo, ua ia te outou ia avanoa e aoao atu ai. O nisi taimi e mafai ai ona e aoao atu faalauaitale ma tuusao e ala i mea e te tautala atu ai ma molimau atu ai. Ma e te aoao atu pea e ala i faataitaiga” (*O Le Aoao Atu, E Lei Se Isi Valaauga E Sili Ai: O Se Risosi Taiala mo le Aoaoina Atu o le Talalelei* [1999], 3–4).

